



Шочмо эл, порылык да чын верч!

Будь готов!

25-ше (3673) №,
2024 ий 21 июнь,
кугарня

Имделий

1933 ий 1 февраль годсек

0+

Пайдале кенезж каныш



Кенезж – йоча-шамычын шер теммеш каныме, капкылым шуарыме, тазалыкым пенгыдемдыме жапышт. Тидлан Марий Элыште чыла йон уло. Тений кенезжым республикыште 202 лагерь пашамышта: школ пеленысе – 178, стационарный – 20, палаточный – 4. Икшыве-шамычлан түрлө направлений дене поян программым ямдылыме. Теве Йошкар-Оласе 31-ше номеран школ пеленысе «Мечта» лагерьыште корнышто коштмо правил-влакым палымылан, илышыште кучылт моштымылан кугу туткышым ойырат (снимкылаште). Индеш отряд 224 йочам иквереш чумырен. Госавтоинспекцийын пашаенже-шамыч дене вашлиймашым эртараш түрлө оборудованиан инновационный

площадкым келыштаренит. Икшыве-влак яра жапыштым пайдалын эртарат. Экскурсий дене Медведево посёлкышто верланыше зоопаркыш миенит. Рүдоласе тоштерлаште, театрлаште лийыныт. Йоча-шамыч специальный военный операцийн участникше-влаклан серышым возыныт. Таза илыш-йүла акций радамыште Марий Эл Республикысе Эпидемиологий да гигиене рүдерын пашаенгышт тамакын энгекше нерген каласкаленит. Лагерьыш «Викинг» каныме клуб гыч толшо-влак түрлө модышым эртаренит. Икманаш, пайдале кенезж каныш куаным конда, у тунемме ийлан вий-куатым ешара.

З.ТИМОФЕЕВА.
И.РЕЧКИНЫН фотожо-влак.





Моско гыч – сенымаш дене

Кажне ийын эртаралтше «Московский кораблик мечты» фестивалым элнан рўдолаштыже иктешленят. Тушто йоча телевизионный, любительский да анимаций фильмлам акленят. Йошкар-Олагыч тунемше-влакын пашашт-шамыч «Московский экран» любительский фильм конкурсышто ойыртемалтыныт. «Вера», «Наследие прадедушки» да «Далёкое близкое» документальный фильмла лауреат-влак радамыш лектыныт. «Таковы условия» игровой

фильм фестивалын дипломантше лийын.

Анна Чрелашвилим (Йошкар-Оласе 29-ше №-ан тунемме комплексе), Никита Журкиным (М.В.Ломоносов лўмеш лицей), Василиса Фурзиковам (Семёновка селасе 21-ше №-ан школ) да Евгений Ахпайдеровым (19-ше №-ан школ) (снимкыште) кугу сенымаш да лауреат лиймышт дене саламлена.

В.МАМАЕВА ямдылен.

Фотом «ЗУМ» йоча киностудийын сайтше гыч налме.

Йоратыме пагыт

Кенез – эн йоратыме пагытем. Тудым кө огеш акле? Кенез тўрлө тўсан чияж дене кажным куандара. Чевер кечын шырательн ончалмыже, леве мардежын пуалмыже чоныш ласкалыкым пуртат. Кайыкын шўшкалтен муралтымыже куан кумылым

пөлекла. Ялыште южат яндар, шўлашыжат куштылгырак.

Йоча-влак, кенез каникулдам пайдалын эртарыза. Емыжым погыза, ача-аваланда полшыза, вес тунемме ийлан вийым ешарыза.

Юля ЯГОДАРОВА.

Советский, Кельмаксола.

Школ пакчасе тамлырак

Кенез канышыш кайыме деч ончыч школ пакчаште тўрлө пакчасаскам: шоганым, помидорым, киярым, ковыштам, паренгым – шынденна, кешырым, йошкаруш-

меным ўденна. Кызыт черет дене дежурствыш коштына. Шўкшудым кўрына, вўдым шавена. Каныме семын тўрлө модыш дене модына. Марий калык модышламат шарналтена.

Кенез гоч тыршен пашамыштымынан лектышыже шыжым палдырна. У тунемме ийлан школ кочмыверыште пакчасаска шапаш ямде лиеш. Эн кугу куанже – чыла тидым ме шке ончен куштена.

Софья ФЕДОРОВА.

У Торьял, Кузнеч.



Российысе увер

Вич ияш гыч тўналын кумылан кажне ег «Эковывоз» тўнямбал экологий конкурсыш 6 сентябрь марте ушнен кертеш. Тўрыс уверым ecologysirius.ru сайтыште лудса.

«Артек» тўнямбал йоча рўдер «ЭКО-АРТЕК» конкурсым увертарен. Тушко 12-17 ияш ўдыр-рвезе-влакым ушнаш ўжит. Паша ден йодмашым 14 июль марте вучат. Тичмаш увер – artek.org сайтыште.

«Кухня» телеканал ден Йоча радио кочкаш ямдылаш йоратыше 6-14 ияш ўдыр-рвезе-шамычлан «Кухня. Дети» конкурсым эртарат. Кум сеныше телевизионный программын тўн геройжо лийын кертеш. Пашам 31 июль марте колтыман. Конкурсын условийжым кухня.дети сайтыште пален налза.

Марий Элысе увер

24-29 июньышто Козьмодемьянск олаште самырык сўретче-влакын Всемарийский пленэрышт лиеш. Тушко республикысе йоча сымыктыш школлагыч 60 тунемше да Йошкар-Оласе художественный училище да школлагыч 6 туныктышо ушнат.

5-6 июльышто Медведево район Руэм посёлко воктене федерал кўкшытан «Сабантуй» пайрем эртаралтеш. Российысе 72 регион гыч 500 утла делегат толшаш.

20 июльышто Козьмодемьянск олашке «Бендериада – 2024» регион-влак кокласе сатир да юмор фестивалыш вашкыза. Фестиваль ятыр конкурс ден мероприятийлан поян лиеш.

Геройын подвигшым ужын

Совет Ушемьн Геройжо Александр Матросовын подвигше нерген шукын палат: кнйгам лудыныт але кинон онченыт. Подвигшым шке шинча дене ужшо снгат лийын. Тудо ялыштем туныктышылан пашам ыштен. Тидын нерген Изивика акай тыгерак каласкален: «Лапкашор ял гыч школышкына туныктышылан Байбатыр Бикмурзинвич Гайнуллин толын ыле. Мемнан дене 1949-1951 ийлаште пашам ыштен. Офицер формо дене чўчкыдын коштын. Пайрем годым онгышкыжо орден ден медаль-влакым пижыктен. Урок жапыште сарыште кредалмыж нерген каласкален. Тунам туныктышына деч Александр Матросовын подвигшым шке шинчаж дене ужмыж нерген пален налынна. Великие Луки ола воктене Чернушки ял верч кредалмаш нерген ойлымыж годым ылыж касн, шинчаже йўлен, йўкшў вашталтын. Доскаш схемым сўретлен, мемнан салтак-влакын окопыштын кушто верланымашт, фашист тўшкан кушто лиймышт да Александр Матросовын кушеч да кузе нушкын кайымыж нерген каласкален. Тудын ойлымыж почеш, совет салтак, амбразур дек миен шуде, гранатым кудалтен, но пудештарен кертын огыл. Варажым амбразурым шке капше



дене петырен. Атаке деч вара огневой батарейын политрукшо Байбатыр Бикмурзинвич да моло офицер геройын пуля дене шўткалалт пытыше капшым конденыт. Кушан да кузе тойымыштым каласкален.

Туныктышына 1941-1947 ийлаште Совет Арми́й радамыште служитлен. Кугу Ачамланде сарыште Центральный, Воронежский да 1-ше Украинский фронтлаште кредалын. 1951 ий телым азапыш логалын коллен. Байбатыр Бикмурзинвичын – туныктышын, офицерын, ачан – ўмыржў кўчык лийын, но волгыдо».

Ф.БАЙТУКОВ.

Башкортостан, Илиш, Октябрь.

Унала коштам

Ковам Серафима Николаевна Конакова (снимкыште) 1940 ийыште почын. Сар тўналме годым тудлан улыжат ик ий лийын. Ончылно куштылго огыл



илыш вучен. Ешыште вич йоча кушкын. Кажныжым изинек мланде пашалан туныктеныт. Сар деч вара элым вияндыме пагытыште ковамланат моло семьянак шуко сомыл логалын. Пасу пашам ыштен, волькым ончен, фермыште аважлан полшен. Илышыштыже ятыр йўштў-шокшым ужаш логалын, но поро чонжым арален коден моштен. Шым икшывыже, латвич уныкаже да лу кугезе уныкаже чўчкыдын унала коштына. Вашлийме годым илышын кажне татшым аклаш, икте-весе дене келшен, вашла полшен илаш кўлмў нерген ойла. Ковам дене моткоч кугешнем.

Роман МИХАЙЛОВ.

Шернур, Эпак.

Фотом еш архив гыч налме.

22 июнь –
Ойганен
шарныме кече.



Руш кугу поэт Г.Р.Державин

манмыла:

«...Эл верчын колышо айдемын
Ок воло чапше ўмыреш.
Йўд тенгыштитат тылзе семын
Эреак тудо волгалтеш».

Лийже тыныслык мландымбалне

Кугу Ачамланде сар айдеме чонеш кугу сусырым коден. Ныл ий жапыште кунар шужымаш, миллион дене колымаш, сусыргымаш лийыныт. Совет Арми́йын салтакше-влак лўдде кредалыныт, Сенгымашым лишемденыт. Мыйын шонемаште, Шочмо элым чот йўратымаш Сенгымашым лишемдаш полшен.

Александра ФИЛИПОВА.

* * *

Кеч-могай сар осал чонан айдеме тукумын шакше койышыжлан кўра тўналеш. Кугу Ачамланде сар мыняр ешыш ойгым конден. Ача, иза, ака-влак фронтыш каеныт. Шочмо элын тыныслыкше верч йўдшў-кечыже лўдде кредалыныт да сененыт.

Самырык тукум сарын кочыжым ынже пале ни гунам! Йоча-влак ача-ава пелен илышт. Кажне элыште тек тыныс илыш да мландымбалне канде кава лийыт.

Глеб НИКОЛАЕВ.

* * *

Кугу Ачамланде сарыште мемнан тагаш ўдыр-рвезе-влак лўдде кредалыныт. Ме нунын дене кугешнена. Подвигыштым шарнен, кеч-могай неле-йўсым сенен лекташ вий-куат ешаралтеш. Элым аралыше-влакым ойганен шарнена да тыныс илышым арален кодымыштлан вуйнам савена.

Виктория НИКИТИНА,

Владимир НОВИКОВ.

1-ше номеран Морко школ.



Физкультура

Мече почеш куржталына

Кенеж каныш годым, пырля погынен, түрлө модыш дене модына. Мыланна футболла модаш утларак келша. Каникул гынат, школ стадионышко вашкена. Тушто, кок командылан шелалтын, шер теммеш мече почеш куржталына. Сенгыше командылан, ваш-ваш огына шыдешке. Ме йолташ улына, икте-весе дене келшен илена.

Глеб МИХАЙЛОВ.
Морко, Коркатово.

Уш-акылым пайдара

Мемнан школышто «Шахмат» кружокым физикым да математикым туныктышо И.Г.Богданов вұда. Шкеже шахмат дене пеш сайын модеш. Районышто эртаралтше шахмат турнирыште сенгыше-шамыч радамышке лектеш. Тунемшыже-влакымат тагасымашлан ямдыла. Кузнеч школын ныл шахматистше «Первенство по быстрым шахматам» районысо турнирыште тагасен. Шке ийготан-влак коклаште мый икымше верым сенен налынам. Костя Мамаев – кокымшым, Артемий Веденькин кумшо лийын. Мыланна медалым да грамотым кучыктенят. Тыгай сенымашыш шумаште Иван Григорьевичын надырже моткоч кугу. Тудлан таум ойлена. Шахмат уш-акылым пайдара, шонаш тарата, ончык ужын мошташ туныкта.

Вероника МАМАЕВА.
У Торъял, Кузнеч.

Илышлан туныкта

Марий Турек район Арбор кундем Памашъялын эргыже Денис Петров (снимкыште) спортлан изиж годымак шұмангын. Тений тудо визымше классым тунем пытарен. Вич ий жапыште ятыр грамот да диплом деч посна шотлен пытарыдыме медальже погынен. Денислан спортын чыла видшат келша, но туризм эн чот лишыл. Тидлан тудым тренер, физкультурым туныктышо Людмила Николаевна Семёнова шұманден. Изирак класслаште тунеммыж годым рвезе кружокыш коштын, туризм дене тўналтыш шинчымашым налын, ты спорт дене лишкырак палыме лийын. А визымше классыште тудым тренировка ден тагасымашла вученят. Урок деч вара кодын, кужене тагасымашлан чот ямдылалтыт. Тыршымышт арам огыл: команде дене сенгыше-влак радамыш чўчкыдын лектыт. Мутлан, «Сосновая роща» тунемме да тренировкым эртарыме базыште «Лўдыкшыдымылык школ» республикысе тагасымаш май мучаште эртаралтын. Туштат чулымлыкыштым, писылыкыштым ончыктен, команде дене кокымшо верым сенен налыныт.

«Туризм капкылым веле огыл шуара, түрлө нелылык лекме годым йўным муын мошташ туныкта. Мутлан, кид йымалне нимо уке годым консерве



банкым кузе почман але шырпе вўдыштат йўлыжў манын, мом ыштыман... Тидым туризм кружокышто пален налынам. Чылажат илышыште кўлеш лиеш. Тренерем Людмила Николаевналан тауштем», – оила рвезе.

Денисын акаж ден изаже спортлан шұман улыт. Розалия туризм дене кылым кучен, ятыр медальже погынен. Алексей – тале футболист. Тугеже нуно шольыштан чын пример улыт. Ака-изам ончен, Денис кўкшў сенымашке шуэш.

В.МАМАЕВА.
Фотом еш архив гыч налме.

Спорт – йолташем



Мый Оршанке район Кугу Ёрша школышто 9-ше классым тунем пытаренам. Спорт дене пенгыде кылым кучем. Ориентирований, баскетбол да спортын эше икмыняр видше дене шинчымашым налам. Спорт туризм дене 2-шо разрядым пуэныт. Районласе да регион-влак кокласе мероприятийлаште вий-куатем тергем (снимкыште). Москошто эртаралтше всероссийский тагасымаште «Юный спасатель» значок дене палемденят. Нине направлений дене ончыкыжымат участвоватлаш кумылем уло.

Аполлинария ШАТИКОВА.
Фотом еш архив гыч налме.



Тыршыше егын лектышыже

Ешын идалыкше уста ег-влакым түрлө мероприятийыш уша. Пайремлаште чолга ешым ужын, кугешнаш веле кодеш. Медведево район Пурсанур села гыч Л.Л.Москалева дене Калык тувыра пörтыштö эртаралтше Уярня пайремыште палыме лийынна. Лариса Леонидовна Йошкар-Оласе 21-ше номеран Семёновка школышто англичан йылмым туныкта. Алексей пелашыж дене кок икшывым ончен куштат. «Всея семьей» россиясе проектыш ушнышо икоян еш шинчалан вигак пернен. 4-ше классыште тунемше Матвей эргыже шке кид дене ыштыме марий вургеман изи курчак-влакым да моло поделкым ончыктен. Икшывын кок коважат кажне модмашыш, куштымашыш кумылын ушнен **(снимкыште)**. Пеленышт кондымо вужга мелнаштым эре кочмет веле шуэш. Снеге варенье дене мемнамат сийленят.

– Пырля келшен ильмаш кеч-кунамат сенымашыш шуаш полиа да ончыкылыклан ушаным шочыкта. Мönгыштö пашам чылан канашен ыштена. Пакчана уло. Түрлө кушкылым, возжаскам, киярым, пеледышым шындылынна. Кеңезым коча-кова-влак дене пүртүсыш лекташ йöратена. Эрден эрак кынелын, чодыраш понгым погаш каена. Пайремым родо-тукым дене пырля веселан эртарена. Мыйынат, пелашемынат авана-влак уста койыш-шоктышан улыт. Унала толмышт годым түрлө вел такмакым шергылтарен,

марий койышым ончыктат да кумылым ылыжат. Мемнан дене пырля конкурслашкат куанен ушнат. «Изба» ООО-н эртарыме «Чучела Масленицы – 2022», «Масленица-Берегиня – 2023» конкурслаште участвоватленна да сенышыш лектынна. Марий орнамент дене сöрастарен, онгырым ыштена, Уярня кувалан вургемым ямдыленна. Ешыште тиде пайрем ынде йöлаш пурен, манаш лиеш. Мыланем мероприятийлашке изинек ушнаш келишен. Концертлаштит мастарлыкем чүчкыдын ончыктенам. Кызыт икшывем-влакым кумыландем, – ойла Лариса Леонидовна.

Москалевмытын ешыште Елизавета үдырыштат уста койыш-шоктышан кушкеш. Тений 8-ше классым тунем пытарен. Семёновкысо йоча сымыктыш школыш коштеш, фортепиано дене сайын шокта. Кажне ийын сенымаш дене ойыртемалтеш. Пайремлаште марий мурым йонгалтарымыж дене калыкым куандара. Тудо түрлө шöрыныштö шкенжым терга. 2023 ийыште «Большая перемена» всероссийский конкурсышто участвоватлен да 5-7-ше класслаште тунемше-влак коклаште сенышыш лектын. «Артек» тунямбал йоча рүдериште ты таңасымашым иктешлыше фестивальыште лийын **(снимкыште)**.

– Фестиваль поро шарнымашым коден. Мероприятий шуко самырык тукумым ушен. Ме икте-весе дене палыме лийынна. Театрлашке, шуко вере



экскурсий дене коштыктенят, мастер-классым эртаренят, лекций-влакым лудыныт. Түрлө калыкын йöлаже, тувыраж дене палыме лияш йөн пуалтын. Калык кочкышым тамлен онченна, – каласкала Елизавета.



Л.Л.Москалева 20 ий наре образований аланыште пашам ышта. Уста туныктышо тале организатор семын шкенжым ончыкта. Самырык тукумлан ешартыш шинчымашым пуымо шотыштат кўлын тырша. Удыр-рвезе-влакым чодыра паша дене палымым ышта: школ лесничестве кружокым вўда, 36 удыр-рвезым иквереш ушен. Шуктен шогымо сомылжо кажне ийын у кўкшыт дене чаплана. Тунемше-шамыч дене пырля шымлыме пашам эртарат, проектлашке ушнат да сенышыш лектыт. Нунылан «Орлёнок» всероссийский йоча рүдериш путёвкым кокымшо ий почела ойыренят. Лишыл жапыште кайышаш улыт.

Тыгай ешын тыршымашыжым, сенымашыжым ужын, чон куана да кумыл нöлталтеш.

З.ТИМОФЕЕВА.
Авторын да еш архив гыч налме фото-влак.




Пинеге ден Пырысиге

Иленыт улмаш Пинеге ден Пырысиге. Нуно моткоч келшеныт, жапым эре пырля эртареныт. Пинеге понгым погаш йбратен, а Пырысиге колым куанен кучен. Икана Пинеге ойла:

– Мыят колым кучен кертам!
Пырысиге вашешта:

– Понго погашыже неле ужат?! Мыят понген кертам!

Тыгак ыштат: Пырысиге шкетын чодыраш кудалеш,



Пинеге эгер воктеке чымыкта. Жап эртымеке, мөнгө пөргылыт. Ончат: Пырысигын корзинга пундаштыже икмыняр понго веле кия, а Пинеге ик колымат кучен огыл.

– Уке, Пырысиге, – манеш Пинеге. – Тыге шотлан ок тол, мый тый дечет посна колым энбырен ом мошто.

– Туге, – келша Пырысиге. – Мыйынат тый дечет посна пашам ок ушно. Тыге илаш ок лий. Кеч-могай пашам пырля, каңашен, икте-васылан полшен ыштыман. Тыге келиет, йолташем?

– Келшем, Пырысиге! Келшымаште – вий! Туйкаште паша ушна! – ойла Пинеге. Тылеч вара нуно эре пырля лийыныт, чыла пашам каңашен ыштеныт.



Дарья КАЗАКОВА.
Морко, Волаксола.

Котомкаште

Мотор котомкаште Ручка, Карандаш, Точилке да Ыштыш иленыт. Ик кечын тумам тарватеныт. Ручка ойлен:

– Мый эн сай, эн күлешан улам. Мый кажне кечын пайдам кондем.

– Мыят тунемаш эре полшем, – Карандаш йўкым пуэн.

Нунын ўчашымыштым Ыштыш колын да тыге каласен:

– Арам моктанеда. Мый огыл гын, те тыште огыда лий ыле!

Точилке гына шып киен, тупшо дене веле савырнен возын.

Руш йылме урок тўналын. Возен-возен, Ручкан пастыже пытен. Тудо Точилке деч йодын:

– Мо лийым? Молан возен ом керт? Ала полшет мыланем?

– Тый икендым эн күлешанлан шотлет. Чыла пальышаш улат, – Точилке вашештен.

Ручкан кумылжо волен да нимом пелешташ өрын.

Рисований урок. Сўретлен-сўретлен, Карандашын рўдыжō пудыркен. Тудат Точилке деч сөрвален йодын:

– Йолташем, молан мыят ом возо? Мо кертеш полшен?

– Тыят ушан улат, йодышетлан вашмутым молан от пале?

Карандашат, вуйжым сакен, котомка пундашке шылын возын.

Ыштышынат ўнарже шуко лийын огыл. Лаштыкысе йонгылышым ўштын пытарен кертын огыл. Тудат Точилкылан энгерташ шонен пыштен:

– Точилке, молан мый ўштын ом керт? Йөршеш вием уке.

– Эх, тыйже ниго деч чот моктанышыч, – вашештен Точилке. – Моктанышыш моксиыжō шелеш, маныт.

Роман ИШМАНОВ.
Татарстан, Агрыз, Буймо.

«Заюшкина избушка» йомакысе герой-влакым палыза. Утыжым корандыза.



Юзо ден Шукш

Пеш шукерте ожно ик Юзо илен улмаш. Неле жапыште ен-влак туд-деч польшышым йодыныт. Юзын вашмутшо эре лийын. Икана Юзо деке шонго Шукш нушкын толын. Юзо чот өрмалген, эше тыгай вашлиймаш лийын огыл улмаш.

– Поро Юзо! Тый чылалан полшет. Моткочак неле мыланем, у ылышым пөлекле, сөрвалем, – Шукш пытаргыш шўлышыж дене ойлен.

Юзо тыгай савыртышлан чот өрын.

– У ылышым пөлеклаш ўнаррем ок сите мыйын, – вашештен тудо. – Иктым пальнем, каласе, молан тый але марте мландым-

балне нушкат, шуки улат?

– Мый эре у ылышлан ямдылалтынам. Чонештылаш тўналме жапым вучен иленам. Тушто пиалан лиям, шоненам.

– Умылышым. Юмо деч польшышым йодам. Тудо полша, шонем, – ойлен Юзо.

Тылеч вара Юзо икмыняр кече Шукшым кычалын коштын. Ярнен пытыше порсынгудо деке миен лектын. Тушто Шукшын мотор лывыш савырнымыжым ужын. Юзо умылен, ылышыжым арам эртарен огыл. Поро пашажлан чон ласкалыкым муын.

Полина АЛЕКСЕЕВА.
Морко, Коркатово.



27 июнь – Колым кучымо тўнямбал кече.

Колызо

Кол чўнга лачак эрден,
Тый ит кий, Вачий, мален.
Эх, Вачий, Вачий, ит кий,
Таче тый пўя дек мий.
Омо эргылан кончен,
Пуйто пўя вўд пучен...
Эх, Вачий, тый писын тол,
Тушто лынг ший-шўртнў кол.
Кече йолжым шуялтен,
Вачий вакш гыч тўршталтен.
Вашке курж, Вачий, пўяш –
Тўрлў колым энгыраш.

С.ГРИГОРЬЕВА.

Энер воктене

Мый колым кучаш изи годсек йўратем. Тидлан ачам туныктен. Кызыт пеленже эре коштам. Коктын кок энгыр дене шуко колым кучена. Кажне колызын шке секретше уло. Кенежым эрдене але касвелеш колым энгырман: шокшылан кўра пеш келгышке шылыт. Карака кушкылан верым йўрата. Оланге леве вўдыштў ила. Кўдырчан йўр деч ончыч нужголым кучаш лиеш. Колын койшыжымат колызылан палыман.

Алина АЛЕКСАНДРОВА.
Советский, Шуарсола.

Изи озовате

Пушкыдо да тамле

Кол котлетым ямдылена. Тидлан кўлеш: лу деч эрыктымe 300-400 г кол, 50 г ош кинде, 1 шоган, 1 муно, 50-100 г шўр, шинчал, пурыс, жаритлашлан нўшмўй.

Колым да шоганым мясорубко гоч колташ. Киндым, пушкыдемже манын, шўрыш пышташ. Фаршыш пурысым, шинчалым, муным ешарен, чыла пырля вараш. Котлетым ыштен, йонгыштымo сукара ложашеш пўрдыкташ. Салмаш нўшмўйым пыштен жаритлаш.



Марий Эл Республикыште наркотик ваштареш кучедалме месячник 26 июнь марте шуйна. Тўрлў тўнежыште профилактике мероприятий-влак эртаралтыт. Морко район Изнур клуб пеленысе «Ромашка» йоча лагерьыште «Дорога, ведущая в пропасть» мутланымаш лийын. Книгагудо вуйлатыше Н.П.Иванова наркотикын тазалыкчан энгекым кондымыж


нерген каласкален. Надежда Петровна шке пашаштыже «Наркотики – это смерть», «Спасём наших детей», «Наркотики и здоровье», «Выбор всегда есть» буклет-влакым кучылтын. Тиде теме негызеш икшыве-шамыч сўретым келыштареныт (снимкыште).

З.ТИМОФЕЕВА.

Фотом книгагудын архивше гыч налме.

21 июнь – Пеледышын тўнямбал кечыже.

Российыште ты пайремын символжылан висвис шотлалгеш. Ош тўс арулыкым ончыкта, а нарынче онго – шокшылыкым. Тиде кечын пеледыш фестиваль, флорист-влакын конкурсшт эртаралтыт.



Сўретлен пытарыза да чиялыза.

Шонанпыл тўсан

Мемнан пакчаште тўрлў пеледыш кушкеш: астра, лилий, георгин, петуний, роза да молат. Кажныже шке семынже мотор да кумылым савырыше. Пеледалт шогалмыштым изин-кугун вучем. Кажне кечын вўдым шавем, шўкшудым сомылем. Нуно иканаште огыт пеледалт: иктыже – ончычрак, весыже – варарак. Тамле пушым шарен, шонанпылла койыт. Тыгай годым пакчаште ятыр жапым эртарем. Кажныжын сўраллыкшым эскерен шукташак тыршем.

Кира СМЕРНОВА.
Морко, Коркатово.

Шўмет ден ыштыш-кучышет иктыш ушнат гын, маньт, муро шочеш, пеледыш пеледеш, ылышет волгалтеш...

Мария ИЛИБАЕВА.



Газетым Кыл, информационный технологий да массовый коммуникаций сферым эскерыме шотышто федеральный службын Юл кундем федеральный округысо управленийыштыже регистрироватлыме.
Номер – ПИ № ТУ52-01404,
2023 ий 22 сентябрьыште пумыо.

Марий Эл Республикысе «Марий Эл» увер агентстве» КАУ.
Директор – Е.И.КУЗНЕЦОВ.
Тўн редактор – А.Н.ГРИГОРЬЕВА.

Индекс П4696.
Тираж 1550 экз.
Заказ Формат – А-4-8.

Учредитель-влак:
Марий Эл Республикысе Тўвыра, печат да калык-влакын пашашт шотышто министерстве,
Марий Эл Республикысе «Марий Эл» увер агентстве» КАУ.

Редакций да издатель: Марий Эл Республикысе «Марий Эл» увер агентстве» КАУ,
424006, Йошкар-Ола,
СССР Вооружённый Вийын 70-ше идалькыше урем, 20-шо пўрт.
Тел. 8(8362) 45-22-82.

Газетым редакцийыште погымо да версталыме,
«Марий Эл Республикысе Правительствын типографийже» ООО-што ямде оригинал-макет гыч савыктыме.
Типографийын адресше:
424000, Йошкар-Ола,
Комсомольский урем, 112.

Печатьыш пумы жап – 14-00, фактически – 13-00.

Авторын да редакцийын шонымашышт тўрлў лийын кертят. Серыш-влак мўнггеш огыт колталт. Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru (автор-влакчан)
Сайтын адресше: ямделий.рф



У конкурс

Кенез
канышмын
ик оңай татше

Йоча-влакын чот вучымо кенез канышыштын ик ужашыже мучашкат лишемеш. Сандене кажне кечым оңайын, веселан, шарналт кодшын эртараш тыршыман. Ача-ава, йолташ-влак дене пырля

чодыраш миен толаш лишеш. Вуд воктене пырля каналташ йонан. Шинчымашым келгемдаш маньын, түрлө олаш, тоштерыш экскурсий дене лекман. Спорт дене кылым кучышо-влак, очыни, тангасымашлашке ушнаш жапым ойырат. Кенезым түрлө сынан пайрем, мероприятий-влак лийыт. Туштат жапым пайдалын эртараш тыршыман. Школ пеленысе лагерыште мыняр шарналт кодшо тат-влак палдырнат! Сурт пеленысе пакчаштыже ты жапыште мочол сөрал! Чыла тидым фотош войзен, пашада-влакым «ВКонтакте» соцкылысе «Ямде лий» – марла йоча газет» түшкашке сообщений дене колтыза. Эн шуко лайкым погышо постын озаже сенгышыш лектеш. Түткө лийза. Йүкышө группын подписчикше лийшаш.

Снимкыште: Маша ден Полина Мамаевамыт (Кужэгер, Кугу Регеж).

Ешартыш лайкым кузе погаш?

400 лайк: 2024 ийын кокымшо пелийжылан «Ямде лий» газетлан почто гоч подпискым ышташ да квитанцийжым але копийжым редакцийшке колташ.

200 лайк: электрон подпискым ышташ. 89027382237 номеран телефон дене Сбербанкш оксам колташ але тиде номерышке 150 тенгем пышташ. Электрон почтыдан адресшым возен колташ ида мондо. Редакций гоч подпискым ыштышат тынараке лайкым налеш.

100 лайк: фотода пелен кенез канышда нерген заметкым возаш. Тудым газет лаштыкылаш савыктена.

Ушештарена мыняр шукурак подпискым ыштеда, тунар шукурак лайкым погаш йон лишеш. Тугеже газетлан возалташ родо-тукумдамат ушен кертыда.

Сенгышылан – чапле пөлек.

Пашадам 31 август марте вучена.

Кечылан пеледыш деке миен шуаш полшыза.



Шотлыза.


+ + = 51

+ + = 33

+ + = 20

x + = ??

Янык-влакым келшыше ўмылышт дене ушыза.



Уш-акылетым терге!

14 июньшто Марий АССР-ын сулло да калык артистше П.С.Тойдемарын почмыжлан 125 ий темын.

● П.С.Тойдемар – _____ .

● Чын фамилийже – _____ .

● Шочмо верже – _____ .

● _____ ансамбльым вуйлатен.

● Кугу Ачамланде сар годым фронтышто _____ концертм ончыктеныт.

В.СМИРНОВ ямдылен.

ПОДПИСКЕ

2024 ийын кокымшо пелийжылан «Ямде лий» газетлан подпискым ышташ вашкыза!
Индекс: П4696. Ак: 432 тенгеат 48 ыр (Марий Элыште).

РЕКЛАМА